



საქართველოს იუსტიციის უმაღლესი საბჭო

ქ. თბილისი № 1/144

„ 18 „ ნოემბერი 2020 წ.

გ ა ნ კ ა რ ბ უ ლ ე ბ ა

ვ. დოლიძის ქუთაისის სააპელაციო სასამართლოს სისხლის სამართლის საქმეთა პალატის მოსამართლის თანამდებობაზე უვადოდ გამწესების შესახებ

„საერთო სასამართლოების შესახებ“ საქართველოს ორგანული კანონის 36-ე მუხლის მე-4 და 4¹ პუნქტების საფუძველზე და საქართველოს იუსტიციის უმაღლესი საბჭოს მდივნის თანდართული დასაბუთების შესაბამისად, ვერა დოლიძე 2020 წლის 1 დეკემბრიდან გამწესდეს ქუთაისის სააპელაციო სასამართლოს სისხლის სამართლის საქმეთა პალატის მოსამართლის თანამდებობაზე უვადოდ, კანონით დადგენილი ასაკის მიღწევამდე.

ნინო ქადაგიძე

საქართველოს უზენაესი სასამართლოს თავმჯდომარე
საქართველოს იუსტიციის უმაღლესი საბჭოს თავმჯდომარე

დასაბუთება
ვერა დოლიძის ქუთაისის სააპელაციო სასამართლოს
მოსამართლის თანამდებობაზე დანიშვნის თაობაზე

„საერთო სასამართლოების შესახებ“ საქართველოს ორგანული კანონის 35-ე მუხლის საფუძველზე საქართველოს იუსტიციის უმაღლესი საბჭოს მიერ 2020 წლის 26 ივნისის №1/89 გადაწყვეტილებით გამოცხადდა მოსამართლეობის კანდიდატთა შესარჩევი კონკურსი საერთო სასამართლოების სისტემაში არსებულ ვაკანსიებზე. მათ შორის ქუთაისის სააპელაციო სასამართლოს სისხლის სამართლის საქმეთა პალატის მოსამართლის 1 ვაკანტურ თანამდებობაზე.

კანდიდატთა რეგისტრაცია მიმდინარეობდა 2020 წლის 29 ივნისიდან 19 ივლისის ჩათვლით. მითითებულ ვაკანსიაზე დარეგისტრირდა 6 კანდიდატი.

2020 წლის 24 ივლისიდან 21 აგვისტომდე მოსამართლის საქმიანობის შეფასების მართვის დეპარტამენტის მიერ კონკურსში მონაწილე კანდიდატებზე, მათ შორის ვერა დოლიძეზე მოძიებულ იქნა „საერთო სასამართლოების შესახებ“ საქართველოს ორგანული კანონის 35² მუხლით გათვალისწინებული ინფორმაცია, რომელიც იუსტიციის უმაღლესი საბჭოს წევრებს წარედგინათ 24 აგვისტოს.

კანდიდატის შესახებ მოძიებული ინფორმაცია:

ვერა დოლიძეს აქვს სპეციალობით მუშაობის 26-წლიანი, მათ შორის მოსამართლედ მუშაობის 19-წლიანი გამოცდილება. იგი 2001 წლის 22 მაისიდან არის საერთო სასამართლოების მოსამართლე. ვერა დოლიძე სხვადასხვა დროს იყო ქუთაისის საოლქო, ხარაგაულის რაიონული და ბათუმის საქალაქო სასამართლოების მოსამართლე. ამჟამად ვერა დოლიძე არის ქუთაისის სააპელაციო სასამართლოს სისხლის სამართლის საქმეთა პალატის მოსამართლე.

მოსამართლედ მუშაობის პერიოდში მის მიმართ არ დაწყებულა დისციპლინური დევნა, არ ყოფილა გამოყენებული დისციპლინური სახდელი ან დისციპლინური ზემოქმედების ღონისძიება.

ვერა დოლიძე არის თსუ იურიდიული ფაკულტეტის დოქტორანტი და მუშაობს სადისერტაციო თემაზე - „სისხლისსამართლებრივი პასუხისმგებლობა უეცარი, ძლიერი სულიერი აღელვების მდგომარეობაში ჩადენილი დანაშაულისათვის“. მას გამოქვეყნებული აქვს სამართლებრივი სტატია - „საპროცესო შეთანხმება საქართველოში - გამოწვევები და ტენდენციები“ (2018 წ.).

კანდიდატთან გასაუბრება:

საბჭოს წევრების მიერ კანდიდატების შესახებ მოძიებული ინფორმაციის გაცნობის შემდეგ დაინიშნა კანდიდატებთან გასაუბრება. საბჭოს წევრები კანდიდატ ვერა დოლიძეს გაესაუბრნენ 12 ოქტომბერს. გასაუბრება წარიმართა ღია სხდომაზე და მას ესწრებოდნენ არასამთავრობო ორგანიზაციების წარმომადგენლები.

კანდიდატის შეფასება:

2020 წლის 5 ნოემბრიდან 12 ნოემბრამდე პერიოდში იუსტიციის უმაღლესი საბჭოს 15-მა წევრმა კანდიდატი ვერა დოლიძე შეაფასა კომპეტენტურობისა და კეთილსინდისიერების კრიტერიუმების მიხედვით.

ვერა დოლიძის კეთილსინდისიერების კრიტერიუმით შეფასებისას, საბჭოს შემფასებელმა 13-მა წევრმა მიიჩნია, რომ იგი სრულად აკმაყოფილებს აღნიშნულ კრიტერიუმს, ხოლო 2-მა წევრმა მიიჩნია, რომ აკმაყოფილებს.

საბჭოს წევრთა მიერ ვერა დოლიძის კომპეტენტურობის კრიტერიუმით შეფასებისას ამ კრიტერიუმების მახასიათებლების მიხედვით კანდიდატის მიერ მოპოვებულმა ქულათა ჯამმა შეადგინა 1263 ქულა, რაც ქულების მაქსიმალური რაოდენობის 84.20%-ია.

კენჭისყრის შედეგები:

2020 წლის 18 ნოემბერს ქუთაისის სააპელაციო სასამართლოს სისხლის სამართლის საქმეთა პალატის მოსამართლის ვაკანსიაზე ჩატარებული კენჭისყრის შედეგად, რომელშიც მონაწილეობა საბჭოს 14-მა წევრმა მიიღო, ვერა დოლიძემ მოიპოვა 12 ხმა.

აღნიშნულ ვაკანსიაზე ბიულეტენში შეყვანილ იქნა 5 კანდიდატი, მათგან 2 მოქმედი სააპელაციო ინსტანციის მოსამართლე, 2 ყოფილი მოსამართლე და 1 იუსტიციის უმაღლესი სკოლის ყოფილი მსმენელი, კერძოდ:

1. ბარდაველიძე ლევან - 0 ხმა
2. დოლიძე ვერა - 12 ხმა
3. იმერლიშვილი მარინე - 1 ხმა
4. კლდიაშვილი ლაშა - 0 ხმა
5. ლობჯანიძე გიორგი - 0 ხმა.

1 ბიულეტენი გაბათილდა.

დასკვნა:

კანდიდატ ვერა დოლიძეს კეთილსინდისიერების (საბჭოს 13-მა წევრმა მიიჩნია, რომ იგი სრულად აკმაყოფილებდა აღნიშნულ კრიტერიუმს) და კომპეტენტურობის (სამართლებრივი დასაბუთების უნარის, სამართლებრივი ნორმების ცოდნის, წერის უნარის) კრიტერიუმების გათვალისწინებით, კენჭისყრის შედეგების საფუძველზე, სხვა კანდიდატებთან შედარებით უპირატესობა მიენიჭა და შესაბამისად, ქუთაისის სააპელაციო სასამართლოს სისხლის სამართლის საქმეთა პალატის მოსამართლის თანამდებობაზე უვადოდ, კანონით დადგენილი ასაკის მიღწევამდე განწესდა ვერა დოლიძე.

ნიკოლოზ მარსაგიშვილი
საქართველოს იუსტიციის
უმაღლესი საბჭოს მდივანი